

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 543 del 04/03/2026

Pel tor pèrt bec anter i 18 e i 29 egn per ge fèr front a la endesfides del spazie de la Èlpes

Consei di joegn EUSALP, se pel se candidèr scin ai 12 de mé

[Ladino] Fèr acioche la region alpina tegne poz, la sie sostegnibola e coleèda: na endesfida che domana n lurier adum da man de la desvaliva regions te la Strategia de l'Union Europeèna per la Region Alpina (EUSALP), per fèr acioche l teritorie da mont l vèrde de più envers sie davegnir. Ence chest an, la joena generazioni pel dèr na man per arjonjer chest obietif, col fèr pèrt del Consei di joegn EUSALP, metù adum da 28 comembres (cater per vigni paisc da mont) che resta en cèria un an, col met de n renovament de la encèria amò per un an.

I joegn anter i 18 e i 29 egn che vif te una de la 48 regions che fèsc pèrt de EUSALP te la Tèlia, Germania, Franzia, Austria, Slovenia, Svizra o Liechtenstein pel portèr dant sia candidatura scin ai 12 de mé del 2026.

Na piataforma che va sorafora la seides per la crescimonia di joegn

L Consei di Joegn met a la leta na piataforma acioche i joegn tole pèrt a duta la dezijions di orghegn EUSALP e l arsegura che idees e pensieres che i porta dant i vegne touc en conscidrazion. Chi che tol pèrt se dèsc ju per l svilup de politiches e de projec per l'area alpina portan dant azions concretes, projec e scomenzadives, ge portan dant idees ai politics di Stac e de la regions de EUSALP e sensibilisan en cont de la particolaritèdes de sia regions a nivel european.

I joegn empèra a tor pèrt a n prozes democratch, se confrontan con desvalivanzes linguistiches e culturèles. Enzeze EUSALP empèra dai joegn a tor su de neva idees da chi che vivrà tel davegnir tel raion alpin.

L Consei se bina cater o cinch outes per ogni mandat e l colaborea fora per l an tras strumenc de comunicazion virtuèla te gropes tematics per lurèr fora ativitèdes concretes. I joegn en cèria i se dèsc ju per la mobilità sostegnibola, i se taca ite a de altra scomenzadives per joegn, i laora per la prospetives del davegnir te la regions alpines periferiches e i sensibilisea dintornvia l patrimoniè naturèl e culturèl de la Èlpes.

Se pel se candidèr scin ai 12.05.2026

Ge vel manèr ite la candidatures tras l [portal EUSALP](#). Dal Consei di joegn se vel fèr vegnir fora la desvalivanzes tel raion alpin, per chesta rejon ge volarà pissèr su a chesta selezion, per arseguèr che sie n balanzament anter i joegn candidé di set paijes EUSALP, per naa, jender e esperienza te organizacions de joegn.

I Stac e la regions EUSALP corirà la speises de viac per scontrèdes e evenc a chi che tolarà pèrt i comembres del Consei e i sporjarà consulenza e suport. Per saer vèlch de più: :

<https://alpine-region.eu/alpine-youth>.

EUSALP (EU Strategy for the Alpine Region) l é na strategia Macroregionèla metuda su del 2015 dal Consei European per l rinforzament de la cooperazion sorafora la seides e interregionèla sun n area geografica spezifica, chela de la Èlpes, per ge resoner a endesfides de grop. Fèsc pèrt de EUSALP set paijes: cinch comembres de la UE (Tèlia, Franzia, Germania, Austria e Slovenia) e doi extra UE (Svizra e Liechtenstein), con 48 regions en dut, più la doi Provinzies autonomes de Trent e Busan. La Strategia se met

dant na gestion sostegnibola de la ressorses naturèles e culturèles e la é outa a favorir la conescion e l azes ai teritories da mont, tras azions che sostegn sie svilup.
De altra informaziuns su <https://alpine-region.eu/>.

Enjonta: Placat

Traduzion di Servijes Linguistics e Culturèi del Comun general de Fascia

(cdt)